

1211.

ORDINIS MEDICI

IN

ACADEMIA LIPSIENSI

H. T.

PRO - CANCELLARIVS

D. CHRISTIANVS GOTTLIEB

LVDWIG

THERAPIAE PROF. PVBL. ORD. FACVLT. MEDICAE
DECANVS ACADEM. DECEMVIR COLLEGIORVM MAI. PRINCIP.
H. T. PRAEPOSITVS ET BEAT. MAR. VIRG. COLLEGA ACAD.
REG. BORVSS. SCIENT. ET SOC. BOTAN. FLORENTINAE
SODALIS SOCIETAT. TEVTONICAE LIPSIENSIS
SENIOR

PANEGYRIN MEDICAM

AD D. XXIV. APRILIS A. O. R. MDCCLXVII

INDICIT

ET

DE ISCHVRIA EX TVMORIBVS VESICAE

DISSERIT.

Chirurg. 6122/19
9c 5/36

Ischuria
Tumores v.
Vesicae morbi v.

OLIVIERO

ACCADEMIA

TOCANNOLINI

D. CHRISTIANUS

1710

IN

...

...

...

...

...

...

...

...

1710



In renibus secernitur lotium, quod praeter copiam feri, quam ex sanguine subducit, varias quoque particulas terrestres, oleosas et salinas, ut ex mixtione sana, sic etiam ex corruptis nonnunquam humoribus in morbis, qui crisi euacuatoria terminantur, eliminat. Bona igitur constitutio organorum urinam se et excernentium efficit, ut multae particulae, corpori noxae futurae, flumine continuato, sed per fabricam vesicae interdum ad tempus interrupto, per vias urinarias sine vlla earum laesione transferantur. Quod si vero spasmi, inflammationes vel alia incommoda profluvium urinae impediunt aut retardent, in his viis varia concresecunt peregrina corpuscula, quae effluxum urinae vel difficilem reddunt, vel prorsus impediunt, et ideo dysuriae, stranguriae et ischuriae causae sunt. De his urinae vitiis in vniuersum agere, instituti ratio haud permittit: ergo potius pauca de vitiis viarum urinariarum in calculosis et venereis oriundis praemittam, postea aegrum ex tumoribus vesicae ischuria laborantem describam, et ex inuentis his in dissectione cadaveris tumoribus auxilia horum morborum, imprimis ea, quae ex chirurgia petuntur, diiudicabo.

Aegri, ad calculi genesis dispositi, qui urinam arenulis saepe densissimis refertam mingunt, vel terreas particulas cum mucosis coniunctas, vel moleculas calcareae indolis vt basin calculorum in maiorem molem excrescentium excernunt, crebriora urinae reddendae impedimenta experiuntur. In renibus enim iam irritationes et erosiones cum affluxu guttularum sanguinis, nec non leues inflammationes et inde relictus abscessus, et tandem ulcera fiunt, ex quibus collectiones tartareae, sanguineae, viscidae et purulentae thrombos efficiunt, in vreteribus saepe haerentes, et eorum diametrum ex parte extendentes, ex parte ob spasmus intercurrentem contrahentes. Hi continuato motu tandem etiam in vesica et vrethra retenti no-uis incommodis occasionem praebent. Sed calculi etiam, et minores saepe, attamen angulosi, in vrethra et collo vesicae immobiles redduntur, vel, si in maiorem molem excrescunt, et tunc in vesica potissimum retinentur, in omnibus his viis irritando et erodendo summas vitae molestias inducunt.

Non tantum autem calculosi, sed etiam aegri venerea labe affecti, vel ii potius, qui ex coitu impuro ipsas vias urinae contagio infectas habent, et gonorrhoea virulenta laborant, ad caput gallinaginis et prostaticam, nec non ad glandulas folliculosas compositas, proxime ad prostaticam vel etiam in reliquo vrethrae tractu sitas, exulcerationes patiuntur, quibus liberum urinae profluuium cohibetur. Cum enim ulcerosa erosio non tantum saniem purulentam alat, sed etiam excrescentiae fungosae et densiores quoque carunculae ex laxis his partibus saepe excrescant, et vera ulceribus medendi ratio in absconditis his viis non semper usurpari possit, urinae reddendae impedimenta haud raro in ipso morbi progressu occurrunt. Iniectiones itaque medicatae vel cerei, medicamentis digerentibus, mundificantibus, et exsiccantibus illiti, vix sufficiunt ad viam urinae liberam reddendam, clandestina potius ulcera proserpunt et malum augent.

Quam-

Quamquam autem potus quoque fermentatus corruptus, acidus vel vappidus, cantharidum vsus externus, et multo magis noxius et venenatus internus, saepius hos morbos inducunt, medici tamen, eiusmodi symptomatibus obuientibus, ad calculosam et veneream labem prae reliquis respiciunt, persuasi omnino, crebriores has esse causas, in quas ideo omnis attentio conuertenda sit. Crebrius autem ex venerea labe vel gonorrhoea virulenta, licet curata, vel potius per plures annos consopita videatur, haec urinae reddendae impedimenta repetenda sunt. Tradenda tamen nunc a nobis est historia morbi, in cuius examine de omnibus his cogitauimus, ischuriae tamen causam post mortem demum in fungosis tumoribus, quos vesica conspiciendos offerebat, deprehendimus.

Vir sexaginta trium circiter annorum, vegetus et sanus, bene nutritus et obesus, qui ad vigorem et obesitatem corporis robustissimi per vitam tranquillam, cum maxima edendi cupiditate coniunctam, et per largiorem et optimum victum, interposito nobilioris vini potu, venerat, qui in tranquilla et ordinata viuendi ratione otii nimique victus incommoda vix fenserat, et a multis annis morbo nullo affectus erat, qui plethoram obesam, quam nunc ad senium accedens validis corporis exercitationibus coercere non poterat, largiori venaesectione imminuere tentabat, hic ergo aliquoties de dysuria conquestus erat, quod scilicet matutino tempore urinam prompte dimittere haud posset. Cum tamen hoc obstaculum non quotidianum esset, et paulo post vrina semper et iteratis vicibus sine incommodo flueret; in sola causae disquisitione substiti, nec vlla hac in re remedia propinaui, praeter ea, quae interdum prophylactica huius viri cura vernali et autumnali potissimum tempore exigebat. Praeter infusa purgantia nonnunquam sumebat salis acidularum Egranarum vnciam semis, et largam copiam harum aquarum superbibebat, quo facto non tantum alius saepius mouebatur, sed urinae profluuium expeditissimum erat.

Quamquam vero cognoscebam, eum non tantum in iuniore aetate, sed etiam ad senium accedentem veneri maxime deditum fuisse, iuravit tamen, se nunquam morbo, ex impura venere oriundo, laborasse, neque ego vnquam indicium huius rei in eo animadverti. Ex habitu corporis de clandestina calculi genesi saepius cogitavi, sed nec arenulas, nec mucum arenulis refertum, vnquam in vrina conspexi, quae potius, quoties eam vidi, semper vrinae sanae signa habuit. Quamobrem ne tunc quidem, cum interdum de vrinae difficultate conquerebatur, specialem medendi rationem eligebam, in primis cum transitorium esset malum, quod iam ad dysuriam senilem referebam.

Aliquando summo mane, dum vrinam reddere suscipit, ne guttulam quidem excernere potest, sed tentaminibus sub vario corporis situ et in ipsa alui excretionem incassum institutis, anxius in conclavi obambulabat, et a me auxilium petebat. Mox digitis ad perinaeum admotis collum vesicae premere et blandis frictionibus ad vrinam reddendam disponere allaborabam, sed frustra. Paulo post infusum oreoselini et vitellum ouorum, cum saccharo subactum, ad demulcendam vrinae acrimoniam suadeo, et cataplasma emolliens perinaeo et pubi applico, ad spasmos demulcendos, quos nisu ad vrinam summo adhibito forte excitatos fuisse suspicabar. Post duas horas iterum accedens, aegrum nullum leuamen inde percipere, sed potius vrinae reddendae nisu augeri cognosco. Ad catheteris igitur auxilium propero: at chirurgus, apicem huius specilli curui ad collum vesicae admouens, in via ad cauum vesicae impedimentum sentiebat. Disquisiimus itaque semel iterumque confinia perinaei, quod in homine adeo obeso difficultate non carebat, sed nullam inuenimus causam, cur cathetere accurate introducto vterius progredi non possimus. Chirurgus, qui non vehementi, sed moderata pressione instrumentum vterius promouere intendebat, tandem obstaculum superare videbatur: cum autem filum argenteum ex catheteris canali edu-
ret,

ret, non guttula urinae, sed sanguinis aliquot unciae profluebant, sine ullo tamen aegri dolore, quem alii saepius, si collum vesicae a chirurgo cathetere asperius vrgetur, sentiunt. Nisi enim ipse adfuissem, et partes vicinas accurate disquisissem, forte culpam in chirurgum coniecissem, sed doloris absentia in aegro et cauta obseruatio contrarium indicabat.

Cogitavi postea de venis varicosis ad collum vesicae tumen-
tibus, et licet ante paucas hebdomadas venaesectione larga prophylactica instituta fuisset, ad auertenda tamen inflammationis incommoda venaesectionem iterum suadeo, magnamque sanguinis copiam ad duodecim uncias et ultra subducere iubeo. Exhibebam paulo post emulsiones ex feminibus demulcentibus, et alias cum gummi ammoniaco soluto, interponebam oleum amygdalarum dulcium et iuscula, epithemata varia resoluentia, discutientia, emollientia et clysmata reiterata non negligebam, sed nullum auxilium inde obtinebam.

Accersitis altero die quibusdam medicis amicis, quo consiliis comparatis et indicationis ratio melius pateret, et apta medicamenta seligi possent, accersito etiam alio chirurgo, qui variis tentaminibus et catheteribus mutatis obstaculum superare intendebat, res tamen aegri meliores non reddebantur. Varia illa auxilia, quae vel speeifica diuretica dicuntur, et alia, quae febriles motus compecebant, venaesectiones, clysmata, epithemata, fusus recensere superfedeo, cum affirmare cogar, ea omnino omnia prorsus inutilia fuisse. Fluida parcius dedimus, licet aeger sitiens ea maxime expetebat. Incresebat tamen vesica super pubem adscendens, etiamsi in perinaeo et ad collum vesicae tumorem auctum non perciperemus, quod non obesitati tantum, sed singulari obstaculi rationi adscripsimus, cum de punctura vesicae semel iterumque dispiceremus. Febris sensim in putridam vergebat, sudor largus urinae odorem spargebat, pulsus debilis et tardus aliaque
sympto-

VIII

symptomata succedebant, quibus vires exhaustas cognouimus, et intra quintum et sextum diem ab initio morbi aeger obiit.

Cum autem in omnibus consiliis a nobis captis cognosceremus, ischuriae pertinacissimae causam non tam in collo vesicae, quam paulo altius quaerendam fuisse, obstaculum illud, quod in viuo definire non potueramus, sectione cadaveris, facile nobis concessa, detegere suscepimus. Abdomine igitur aperto, omnia viscera sana et valida inueniebantur, intestina quidem flatibus turgebant, ita vt ad reliquorum viscerum perlustrationem eo aptius instituendam aerem acu punctura expelleremus, varietas tamen assumptorum medicamentorum causam prodebat. Vesica quidem post mortem non adeo tensa, sed paulo flaccidior erat, insignem tamen urinae vim continebat: in renibus et vreteribus nullam labem deprehendimus. Cruciata itaque sectione vesicae facta, urina protinus effluebat, et quod reliquum erat spongiis sugendo eduximus, quo facto ante collum vesicae tumores in icone delineatos tactu magis, quam visu disquisuimus. Quo autem eorundem indolem melius perspiceremus, vesicam cum membro virili et vrethra in eo continuata separauimus, et incisionem ad hunc partium situm produximus. In collo vesicae igitur, ad caput gallinaginis, et in vrethra tota, nullam labem morbosam perspeximus, neque ob irritationem, a catheteris applicatione pendentem, vlla inflammationis vestigia percepimus. Tumores autem ita collocati erant, vt minor, nucis auellanae magnitudinem referens, ferme in medio, sed paululum dextrorsum, ad orificium colli vesicae, non angusto pedunculo, sed ampliori quodammodo basi adhaereret; maior vero, nucis iuglandis magnitudine, sinistrorsum magis, basi etiam non nihil expansa accresceret. Hi tumores steatomata referebant, tactu densa, non nihil resistentia, superficie quodammodo inaequali, non tamen prorsus dura, sed non nihil fungosa, venis varicosis nunc collapsis conspicua. Maior etiam a parte inferiori orificium habebat, quod

quod ad angustum cauum ducebat, hoc vero catheteris immissione supra indicata factum erat; penetrauerat nimirum instrumentum in medium tumorem ita, vt sanguis ex venis turgentibus flueret; ob densitatem tamen superficiei non porro penetrare et vrinae educationem tandem efficere potuerat. In cauo huius tumoris aliqua pars sanguinis congrumati haerebat, et sine vlla inflammatione cauum non nihil conquassatum erat, nullus etiam dolor ob neruorum sensibilibus defectum perceptus fuerat.

Tumor itaque minor, saepe ex situ suo ad ostium colli vesicae pressus, impedimentum facile superandum exhibuerat, maior autem in ipso morbi exortu contracta vesica ita dimotus fuerat, vt totum orificium praeccluderet et obturaret, nulloque modo remouendus esset, cum pressio per catheterem facta eundem potius pertunderet, quam remoueret.

Ex fonte igitur pharmaceutico remedia ad hunc morbum superandum apta peti non poterant, nec aliquem fore timeo, qui hac ex parte vel penuriam artis, vel incuriam medicorum accusare possit: num vero chirurgica opera vel curatio morbi, vel solatium tantum aegro praestari potuisset, paucis adhuc a nobis disquirendum est.

Cum ergo viuo adhuc aegroto locus impediti, vrinae profluuio oppositi, proxime ad collum vesicae certus esset, de calculo autem nihil plane constitui posset, de tumore aliquo cogitatum est. Chirurgiae igitur praecepta vesicam incidere, et tumorem scalpello, vel aliis auxiliis separare iubent. Quomodo autem vel exercitatissimus chirurgus sine catheteris applicatione, et sine specillis curuis et sulcatis, in lithotomia applicatis, locum incisionis ad collum vesicae eligere et definire potuisset? Forte tamen, etiamsi hoc fieri nequit, vesica prope collum, per vrinam extensa et tumida reddita, locum in perinaeo prodit. Sed et tunc, cum tumor in vesica ipsa na-

B tus

tus obicem ponit, locus ille nec turget, nec sine metu laesionis partium vicinarum inciditur. Summa quoque obesitas, quae in aegro nostro fuit, disquisitioni se opposuit, ea enim in principio, et antequam de necessitate perinaei incidendi solliciti essemus, nos in partium situ et catheteris directione tactu disquirendis saepe impediuerat. Quamquam enim puncturam perinaei ad vrinam subducendam necessariam cognoueramus, rationem tamen eius administrandae non inuenimus: si enim vel acu triquetra, vel lanceola applicata, eum in locum peruenissemus, ad quem applicatione catheteris deducti fuimus, tamen in tumorem magis, qui obsistebat, quam in cauum vesicae peruenissemus.

Sed cum aeger diu sine solatio esset, non amplius de remouendo obstaculo, sed de vrina quacunque demum via subducenda, cogitandum fuisset, vt hoc praestito de excogitandis et melius applicandis aliis remediis consilium capi potuisset. Quoniam vero incisio in perinaeo locum non habebat, ea super os pubis fieri potuisset, cum et calculi per hanc viam in apparatu alto extrahantur, et nunc vesica ab vrina maxime distenta super os pubis multum emereret. Sed summa aegri obesitas et hac in re nobis obfuit, quo minus incisionem in viuo tentaremus. Quibusdam etiam nimis timidi videbimus, quod incommoda in vulnere hoc faciendo et aperto seruando forte oboritura nimium metuerimus: ipsa tamen disquisitione cadaueris intelleximus, hanc operationem in obesitate non aequae ac in macilentis perfici posse, cum ad trium pollicum distantiam in pinguedinem penetrandum esset, antequam ad musculos abdominales et per hos ad vesicam deduceremur. Quod si vero vrinam hac via eduxissemus, et obstaculum in tumoribus inuenissemus, eos tamen in abscondito hoc loco extirpare haud potuissemus.

Tandem quoque de alia via vrinae aperienda cogitandum fuisset. Tumidam saepe vesicam versus intestinum re-

ctum

Etum percipiebat chirurgus, clysmata applicans: nonne ergo hoc in loco et per intestinum rectum vesica perfodi et vrina subduci poterat? Acus triquetra, in hunc finem inuenta, cognita quidem nobis erat, sed intra breue temporis spatium non ad manus esse poterat.*) Cum autem post annum similis ischuria nullo modo leuanda se offerret, acus triquetra incurua applicata, et maxima vrinae copia per cannulam subducta est. Sperabamus quidem in hoc aegro excretionem vrinae per vrethram iterum liberam fore, postquam nimia distensio sublata esset, sed spes inanis erat. Etsi enim interdum quaedam guttulae per vrethram secedebant, maxima tamen pars per cannulam in intestino recto relictam effluebat, ideoque nec hunc aegrum seruare potuimus, qui, licet tardius, tabe tamen consumptus periit. Doleo certe, agnatos huius aegri disquisitionem cadaueris mihi et amicis, qui curam eius habuimus, non concessisse, quo in hoc, vt in illo altero, causam fluminis vrinae prorsus interceptae, quam in tumoribus obicem ponentibus coniectura assequebamur, accuratius definire potuissemus; facile tamen apparet, nos aegro, de cuius morbo praecipue egimus, instrumento hoc applicato non penitus, sed palliatue tantum auxilium laturos fuisse, vera enim curatio non sperari potest, nisi tumoribus remotis via per vrethram iterum aperiatur.

In pertinaci igitur hac ischuria auxilia chirurgica quidem non prorsus intermittenda sunt, veram tamen curationem iis nunquam efficiemus, si tantum impedimentum in angusto vesicae collo, vel proxime ad hoc cauum, deprehenditur, hinc seriem remediorum et auxiliorum tantum commemorauimus, quo, quidquid forte in eiusmodi aegris tentari possit, perspiciatur.

B 2

Sed

*) Cl. FLVRANT acum triquetram cannula cinctam incuruam inuenit, qua vesica per intestinum rectum perfoditur, et acu retracta vrina educitur. Vid. Cl. POUTEAU *Melanges de Chirurgie* p. 500. et Cl. CAMPER in demonstrationum anatomico-pathologicarum libro secundo.

Sed missis his, ad officii mei rationem nunc exequendam me conuerto, et Cl. Candidatum, qui assiduo studio in arte salutari addiscenda versatus est, breui commemoratione vitae, haecenus cum laude peractae, commendo.

VIR NOBILISSIMVS ATQVE DOCTISSIMVS
 DOMINVS
GODOFREDVS FROELICH
 MEDICINAE BACCALAVREVS DIGNISSIMVS

Natus est in pago ditionis Zittaiensis, Eybau dicto, anno huius seculi tricesimo quarto, die quarto mensis Augusti, a pauperibus quidem, honestis tamen parentibus, patre nimirum IOANNE GEORGIO et matre ANNA ROSINA REVSSIA. Cum optimi hi parentes curarent, vt prima religionis et literarum initia filio traderentur, P. R. HEINITZ Art. Mag. et Pastor Walddorfensis, qui non tantum discendi cupidinem, sed etiam ingenii praestantiam in nostro obseruauit, a parentibus id obtinuit, vt eius institutioni crederetur, quam ad elementa latinae linguae retulit. Huic itaque primo fortunae suae auctori gratias nunc persoluit maximas, is enim effecit, vt anno aetatis vndecimo in Gymnasium Zittaiense deduci, et optimorum praeceptorum doctrina frui posset. GERLACHII Rectoris, BVCHNERI Conrectoris, STRAVPITZII Subrectoris, GRÜNEWALDI Cantoris, FRÜAVFFII et BRAVNII disciplina vsus est, et memoriam horum praeceptorum, qui omnes, praeter FRÜAVFFIUM, iam e viuis discesserunt, pie colit. Cum autem duos annos cum dimidio Zittauiae commoratus esset, pater diem obiit supremum: hinc subsidiis ad continuanda studia destitutus recedendum ei fuisset, nisi patronos inuenisset, qui eius inopiam subleuarent. Ex his primo loco nominat P. R. GRÜNEWALDVM Art. Mag. olim Pastorem Eybauensem, postea Diaconum Zittaiensem, qui No-

strum

strum non tantum domo excepit, beneficiisque cumulauit, sed alios quoque patronos ei conciliauit, gratus enim profitetur, se a celeberrimis Familiis GEBHARDIS, BESSERIS, NEWMANNIS, atque BOETGERIS, in vniuerso suorum studiorum decursu liberalitate ornatum fuisse. Maximi etiam facit beneuolentiam Exper. Medicorum HEFFTERI et RÜCKE-RI, quorum ille post obitum GRÜN WALDI Nostrum non tantum hospitio et conuictu excepit, sed etiam consiliis adiuuit, hic vero anatomes initia et aliquam historiae medicae literariae cognitionem ei tradidit. Omnibus itaque his adminiculis excitatus, et rei familiaris angustia utcunq̄ subleuata, tandem ad medicinam in academiis tractandam impulsus et praeparatus, Lipsiam, quae etiam indigentium studiosorum alma mater est, accessit, sub initium anni quinquagesimi septimi, et a b. GÖTTSCHE DIO, Rectore Academiae Magnifico, in numerum ciuium academicorum receptus est. In philosophicis doctrinis MÜLLERVM, GÖTTSCHE DIOVM et WINKLERVM, in Mathesi pura RVDOLPHVM, in applicata HEIN- SIVM praeceptores habuit, et S. R. ERNESTIO rhetoricam et Ciceronis orationes explicanti adfuit. In medicorum scho- las postea transiit. Botanicam, anatomem, physiologiam et materiam medicam a BO SIO accepit, eiusque exercitationibus examinatoriis et disputatoriis interfuit, ab eo etiam multis beneficiis adiutus est, inter quae non vltimo loco ponenda est cura, quam graui morbo decumbenti praestitit. IAN- CKIO et HUNDERTMAREKIO in anatomicis exercitationi- bus adstitit, et ab hoc etiam in chemicis doctrinis instructus fuit, vberiore autem chemiae et materiae medicae institutio- nem POERNERVS tradidit, qui ei et copiam fecit eos ae- gros inuisendi, qui eleemosynis publicis nutriuntur. In mine- ralogia et arte obstetricia GEHLERVM sequutus est. POH- LIVS in physiologia, et PLAZIVS, Ordinis nostri Senior grauissimus, in pathologia et materia medica eum instruxerunt,

XIIII

hoc etiam duce exercitationes medicas examinatorias et disputatorias suscepit. Ego vero, qui eum in scholis meis publicis et privatis pathologicis, therapeuticis, clinicis, chirurgicis et forensibus, nec non in exercitationibus practicis attentum et frequentem auditorem cognoueram, eius studia, quantum in me est, adiuuare nunquam intermisi; et cum cognoscerem, eum ob rei familiaris angustiam et imbecilem sanitatem ad ultimos in arte nostra honores capeffendos non prope-rare posse, eum domo excepi, quo mihi proximus esset, et labores meos in cura aegrorum et commentariorum de rebus in scientia naturali et medicina gestis, cum indicibus conficiendis, tum speciminibus typographorum corrigendis, adiuuaret, in quibus rebus mihi etiam maxime utilis fuit, et aegrorum, quibus adstitit, beneuolentiam assiduitate et morum integritate sibi acquisiuit. Sic decennium academicum, quod in tristia belli tempora incidit, satis commode absoluit, et paupertate pressus prouidentiam summi Numinis multis modis expertus est. In conuictorio Electorali diu nutritus fuit, ab amplissimo Senatu Zit-tauensi stipendium accepit, tum Syluersteinianum minus, et Quellmalzianum, ab Ordine nostro in examine probatus, forte obtinuit, et orationem in memoriam L. B. de SYLVERSTEIN, *de medico naturae vestigiis sedulo insistente*, erudite scriptam, recitauit. His vero beneficiis adiutus, eam doctrinae praestantiam acquisiuit, quam in variis speciminibus declarauit. Anno sexagesimo mense Aprili examen theoreticum sustinuit, et prima medicinae laurea honoratus est. Anno sexagesimo secundo mense Iulio in Lectionibus pro Licentia *de venenorum efficacia infringenda* disseruit, et anno sexagesimo quarto ad practicum examen admissus, eam rerum medicarum peritiam declarauit, quam ab iis exigimus, qui Doctoris titulo ornandi, et ad medicinam faciendam admittendi sunt. Cum etiam anno sexagesimo quinto Exper. WIPACHERVS Dissertationem *de pblogisto animali ut variorum morborum medela*

medela defenderet, Cl. Candidatum socium sibi elegit. Hoc demum anno de summis in arte medica honoribus capeffendis cogitavit, et dissertationem *de morbo miliari* elaboravit, quam sub Praesidio Excell. BOSII die vigesimo quarto Aprilis publico dissentientium examini exponet. Ego vero colloquio erudito finito, et oratione recitata, qua *bilaritatem ut caussam sanitatis* considerabo, postea officio Procancellarii lubenter defungar, et Cl. Candidato, cuius assiduitatem, morum praestantiam, et acquisitam rerum medicarum cognitionem multis modis cognoui, Licentiam Doctoris titulum sumendi publice tribuam.

Quo autem panegyris splendidior sit, RECTOREM ACADEMIAE MAGNIFICVM ILLUSTRISSIMOS COMITES VTRIVSQUE REIPUBLICAE PROCERES GRAVISSIMOS, nec non HUMANISSIMOS DOMINOS COMMILITONES, ea, qua par est, obseruantia et humanitate obtestor atque rogo, vt nobis beneuole adsint, et ita Ordinem nostrum, Cl. Dn. Candidatum et me sibi obstrictissimos reddant. Dabam Lipsiae Dominica Paschatos. A. O. R. MDCCLXVII.

L I P S I A E
LITTERIS VIDVAE LANGENHEMIAE.



ICO.



ICONIS EXPLICATIO.

Vesica urinaria cum parte vrethrae, ab anteriore parte
aperta.

- a. a. Corpus vesicae.
- b. b. Partes eius incisae et vtrinque reclinatae.
- c. Collum vesicae.
- d. Tumor maior.
- e. Tumor minor.
- f. Vrethrae pars aperta.
- g. Eminencia caput gallinaginis dicta cum orificio medio.
- h. h. Orificia ductuum excretoriorum prostatae.
- i. i. Corpus cauernosum vrethrae.
- k. k. Vreteres abscissi.
- l. l. Vasa deferentia abscissa.
- m. m. Vesiculae seminales.
- n. n. Prostata.
- o. o. Musculi erectores.



Chir. 218

Handwritten text on a white paper insert, consisting of two lines of stylized characters. The top line appears to be 'H' and the bottom line appears to be 'B'.



Chr. 2/18, 56

